



Progetu finantziu cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Su contu de Monti Santu

Me in is tempus antigus una navi a vela, ca bitiat genti torrendi de s'Ìndia, fiat viagendi in su mari. Totinduna mudat su tempus, de bonu chi fiat in malu e incumentzat a tirai bentu, custu bentu ddus scutulat de una parti a s'àtera fintzas a candu non sciant prus anca fiant. Intzandus s'avocant a sa Santa de sa navi e ddi promitint ca chi ddus sarvat ant a fraigai una capella in onori suu, in su logu innui ant a sbarcai, e custa capella at a essi fraigada in unu logu aici artu de dda podi biri totus is marineris chi ant a passai inni acanta.

Su bentu ddus at portaus a sa praja de Pula, e si fiant sarvaus giai-giai po miràculu de is scòllius de Nora. Intzandus, in unu monti a faci de anca fiant sbarcaus, ddoi ant fraigau una cresiedda in onori de sa Santa ca ddus iat sarvaus e a su monti dd'ant postu su nòmini de Monti Santu e sa cresiedda s'agatat fintzas a oi inni manca siat unu pagu sciorrocada.

Su Maurreddinu

Candu Deus iat acabau de creai su mundu, Santu Perdu cun Gesùs Cristu fiant bòfius andai in giru po biri cali efetu fadiat a castiai totu su chi Issu iat creau. Arribant a Nuxis e Santu Perdu Narat a Gesùs Cristu:

- Su Maistu, as pòtziu creai totu: molentis, crabas, òminis, perou ti ses scarèsciu de creai sa cosa prus de importu;

Gesùs Cristu dd'arraspundit:

- Ma ita est ca depu creai ancora;

E Santu Perdu:

- Arragorda-ti, dona atentzioni est sa cosa prus de importu ca nci potzat èssiri!

E Gesùs:

- Mah! Apu pentzau meda ma mi parit ca no amanchit nudda. Narami-ddu tui imui, ma in su sèriu ita est su chi amancat.

E Santu Perdu:

- E su Maurreddinu candu pentzas de ddu fai?

E Gesùs Cristu dd'arraspundit:

- Pentzamu ita fessit! Nci at a bolli meda a fai unu Maurreddinu.

Ant sighiu a caminai e Santu Perdu pentzàt:

- Imui bolli biri cumentì fait a creai su Maurreddinu giai ca est una cosa de nudda.

In s'interis ca fiat crìstionendi Gesùs Cristu abàsciat is ogus a terra e birit unu pagu de picciàciu de boi, ddi donat una furconada de pei e bessit aforas su Maurreddinu cun is mīgias nieddas, cun is cratzonis de pannu, su giponi allutonau e sa barrita a cagalloni.